

et autres dont dessus est faite mention, sans licence de nous ou du dit
Bailli ou autres nos officiers ont mis ou fait mettre le dit Robin en i-
celle eschelle assise en la dite ville de Cerny en nosres fons et haute
justice, lequel procès leur seroit moult sumptueux, si comme il dient.
En nous humblement supplié comme il dient fait cestui exploit sans
convoitise, cuidans que il eussent droit de faire par ce que autrefois ja pieca
sans empeschement il l'ont fait, nous sur ce leur veillons eslargir
notre grace. Nous adcertes pour considération des ^{portos} ~~portos~~ et dommages que
les dis exposans ont sustenu pour le fait de nos guerres aus dis exposans
et à ceulx qui de ce fait à la requeste de notre dit procureur sont
poursuiz, avons remis, quitté et pardonné ou dit cas, remettons, quit-
tons et pardonnons de certaine science et grace especial le dit fait et
toute paine, amende et offense que pour ce il pevent avoir encouru
envers nous, convient que ce soit et sur ces choses imposans silence per-
pétuel à notre dit procureur, souz ceste condition que par cestui cas
ou exploit aucun droit de juridiction ou autre n'est et ne sera acquis
ores ne au temps à venir aus dis exposans et commune, ne pour
ce prejudice sera fait à nous ne à notre juridiction en aucune manière.
Si donnons en mandement au dit Bailli de Berrymois et à tous
nos autres justiciers ou à leurs lieutenants présents et à venir et
à chacun d'eulx si comme à lui appertendra que les dis expo-
sans et autres dessus nommez fassent et seuffrent joir et user de notre
presente grace et remission sans les molester ou contraire et tout qui
de leur droit esté ou seroit empesché pour celle cause leur mettent
ou fassent mettre à plaine délivrance. Et pour ce que ce soit ferme
chose et estable a tousjours nous avons fait mettre notre seél
à ces lettres. Sauf en autres choses notre droit et l'autrui en
toutes. Donné à Paris en notre hostel les Saint Pol, au mois
de juillet l'an de grace mil ccc lxxiiii. Et le xi de notre
Regne.

f. de Metis

Par le Roy en
ses Requestes Henry